



KEMENTERIAN PERALIHAN TENAGA  
DAN TRANSFORMASI AIR

## KENYATAAN MEDIA

### YAB TIMBALAN PERDANA MENTERI MERANGKAP MENTERI PETRA KETUAI DELEGASI MALAYSIA KE JAKARTA SEMPENA *INDONESIA SUSTAINABILITY FORUM (ISF)*

**PUTRAJAYA, 3 SEPTEMBER 2024** – Timbalan Perdana Menteri merangkap Menteri Peralihan Tenaga dan Transformasi Air (PETRA), YAB Dato' Sri Haji Fadillah Haji Yusof akan mengetuai delegasi Malaysia ke Jakarta dalam sesi lawatan kerja rasmi beliau pada 4 hingga 6 September 2024.

Dalam rangka lawatan kerja rasmi tersebut, beliau dijangka akan hadir dan menyampaikan ucapan di Indonesia *International Sustainability Forum 2024 (ISF 2024)* di Jakarta, Indonesia pada 5 – 6 September 2024 atas jemputan Kerajaan Indonesia. Kehadiran YAB Dato' Sri Haji Fadillah ke forum ini bakal memperkukuh imej dan peranan Malaysia dalam agenda kelestarian dan kemampanan di peringkat antarabangsa terutamanya dalam visi peralihan tenaga, selain menggambarkan komitmen berterusan Malaysia dalam mencapai agenda *net zero* menjelang tahun 2050.

Pendirian Malaysia dalam menunjukkan komitmen aktif dalam agenda kemampanan dan kelestarian dalam mitigasi iklim melalui perluasan penggunaan tenaga boleh baharu di peringkat nasional dan serantau,

termasuk dalam aspek *coal phasing-out* adalah penting untuk diketengahkan di forum antarabangsa seperti ISF 2024. Selain itu, ia turut menunjukkan ketersediaan Malaysia dalam melaksanakan peralihan secara lestari kepada para pelabur asing agar boleh meningkatkan keyakinan mereka untuk membuat pelaburan di Malaysia sekali gus mendorong para pelabur menyempurnakan agenda kemampanan dan matlamat *Environmental, Social and Governance* (ESG).

Pada masa yang sama, YAB Dato' Sri Haji Fadillah turut dijangka mengadakan kunjungan hormat ke atas Menteri Koordinasi Bidang Kemaritiman dan Investasi Republik Indonesia, Tuan Yang Terutama Bapak Luhut Binsar Pandjaitan.

Dalam siri lawatan rasmi beliau ke Jakarta, YAB Dato' Sri Haji Fadillah turut dijadualkan bertemu dengan diaspora Malaysia di Jakarta bagi berkongsi mengenai usaha dan inisiatif pembangunan terkini negara terutamanya dalam aspek peralihan tenaga.

## **KEMENTERIAN PERALIHAN TENAGA DAN TRANSFORMASI AIR**

### **3 SEPTEMBER 2024**

---

Unit Komunikasi Korporat | Kementerian Peralihan Tenaga dan Transformasi Air (PETRA)

Tel.: 03-8000 8000 | E-Mel: [ukk@petra.gov.my](mailto:ukk@petra.gov.my)

